

元遺山先生全集

卷末

附錄

補載

元遺山先生集附錄

讀書山房刻本

明海陵儲 罐柴墟輯

無錫華希閔豫原增

烏程施國祚北研續增

陵川集本遺山先生墓銘

郝經

歲丁巳秋九月四日遺山先生卒於獲鹿寓舍十日訃至  
經走常山三百里已馬舁歸葬爇文酌酒哭於畫像之前  
而已先生與家君同受業於先大父經復逮事先生者有  
年義當敘而銘之詩自三百篇以來極於李杜其後纖靡  
淫豔怪誕癖澀寢以弛弱遂失其正二百餘年而至蘇黃

振起衰踣益爲瑰奇復於李杜氏金源有國士務決科干  
祿置詩文不爲其或爲之則羣聚訕笑大以爲異委墜廢  
絕百有餘年而先生出焉當德陵之末獨以詩鳴上薄風  
雅中規李杜粹然一出於正直配蘇黃氏天才清瞻邃婉  
高古沈鬱大和力出意外巧縟而不見斧鑿新麗而絕去  
浮靡造微而神采粲發雜弄金璧糝飾丹素奇芬異秀洞  
蕩心魄看花把酒歌謠跌宕挾幽并之氣高視一世以五  
言雅爲正出奇於長句雜言至五千五百餘篇爲古樂府  
不用古題特出新意以寫怨思者又百篇餘用今題爲樂  
府揄揚新聲者又數十百篇皆近古所未有也汴梁亾故

老皆盡先生遂爲一代宗匠以文章伯獨步幾三十年銘天下功德者盡趨其門有例有法有宗有趣又至百餘首爲杜詩學東坡詩雅錦機詩文自警等集指授學者方吾道壞爛文曜瞠昧先生獨能振而鼓之揭光於天俾學者歸仰識詩文之正而傳其命脈繫而不絕其有功於世又大也每以著作自任以金源氏有天下典章法度幾及漢唐國史興已所當爲而國史實錄在順天道萬戶張公府乃言於張公使之聞奏願爲撰述奏可方闢館爲人所沮而止先生曰不可遂令一代之美泯而不聞乃爲中州集百餘卷又爲金源君臣言行錄往來四方采摭遺逸有

所得輒以寸紙細字親爲記錄雖甚醉不怠於是雜錄近  
世事至百餘萬言捆束委積塞屋數楹名之曰野史亭書  
未就而卒嗚呼先生可謂忠矣先生諱好問字裕之太原  
定襄人系出拓拔魏故姓元氏曾大父某大父某父某妣  
某氏先生七歲能詩太原王湯臣稱爲神童年十一從其  
叔父官於冀州學士路宣叔賞其俊爽教之爲文年十有  
四其叔父爲陵川令遂從先大父學先大父卽與屬和或  
者譏其不事舉業先大父言吾正不欲渠爲舉子爾區區  
一第不足道也遂令肆意經傳貫穿百家六年而業成下  
太行渡大河爲箕山琴臺等詩趙禮部見之以爲少陵以

來無此作也以書招之於是名震京師目爲元才子登興  
定五年進士第不就選往來箕穎者數年而大放厥辭於  
是家索其什人嚼其句洋溢乎里巷吟諷於道途巍然坡  
谷復出也正大中辟鄧州南陽令南陽大縣兵民十餘萬  
帥府令兼鎮府甚有威惠以太夫人衰疾辭劇致養轉內  
鄉令丁艱憂終喪詔爲尙書都省掾天興初入翰林知制  
誥金亾不仕而卒春秋六十有八卒之某月日葬定襄之  
先塋前配太原張氏再配臨清毛氏子男三人曰某某女  
三人長適進士程端甫次爲女冠次適張某銘曰

士子賈技爭綴緝僥倖寸祿奔走急以爲詩文作無益糞

壤擲弃明月璧先生卓犖有異識振筆便入蘇黃室開闢  
文源翦荆棘大聲復完全金玉擊爛漫長醉思盈溢瑞錦秋  
花亂堆積險如護前喘肝臆羣犬舐舐共讒嫉塵埃野馬  
爲鬼蜮遺山巖巖倚天壁國史興喪是吾職義烈不負董  
狐筆定襄高寒拓跋國馬舁歸葬反立宅有書有傳俱未  
卒嗚呼先生端可惜嗚呼先生不可得

祭遺山先生文

以下俱見  
陵川集

維年月日陵川郝經謹以清酌之奠致祭於遺山先生之  
靈嗚呼氣數之窮靡物不壞或者不淪胥乃造物者之所  
在造物之所在宜莫不生而奪於成是理其可明嗚呼先

生萃靈蜚英翳卣宦學嶽嶽稜稜碩士鴻儒莫不震驚以

爲閒世生

閑閑初見公文曰是閒世生者

渡南河而爲名公入京師而爲

名卿張洞庭之天音引岐山之鳳鳴方雷厲以風飛揆鴻  
章而振纓挫萬象於筆端倒河漢而一傾攄塵言與滯思  
淪錮濁以爲清闕斯文之洪源俾灑汗而淵澄而乃沐蔡  
淪亾蜚血凌城氣數具盡萬化崩騰時維先生獨矯首而  
行挽崦嵫之日慧欲曙之星收有金百年之元氣著衣冠  
一代之典刑辭林義藪文模道程獨步於河朔者幾三十  
年豈非造物者之所在而斯文殆將興耶去魯西來聿峻  
有聲天奎不忒遂入杳冥筆未獲麟年未中壽而奪去之



遽彼造物者果可明耶嗚呼先生雅言之高古雜言之豪  
宕足以繼坡谷古文之有體金石之有例足以肩蔡党樂  
章之雅麗情致之幽婉足以追稼軒其籠罩宇宙之氣撼  
搖天地之筆囚鎖造化之才穴洞古今之學則又不可勝  
言人得其偏先生得其全天不假之年嗚呼哀哉先生雖  
死文或不死是謂亾而不死先生雖可哀吾徒無所仰尤  
爲可哀也嗚呼哀哉尙饗

元遺山真贊

其才清以新其氣夷以春其中和以仁其志忠以勤不啻  
蔡辛與坡谷爲鄰歌謠慷慨喜氣津津唾玉噴珠看花飲

醕而乃蒸香讀易坐席凝塵假耶真耶嗚呼復幾千年更有茲人也耶

原古上元學士

麟死九鼎淪萬世無孔孟文字糠粃餘扶藉不絕聖伊昔大觀季天王始失政中聲入哇淫吾道孰不競金源東北來一洗河海淨斯文甚濫觴幾墜土梗橫吳楚割半天瘡痍僅續命伊洛遽騫騰朱張立朝廷宏肆六藝學俾與日月並中原有奇才詞賦方餽飭天門黃金榜赫耀動萬姓君臣此爲得父師此爲令或者語詩文環視驚盼矜孰意元化精不遂入昏暝浚發自蔡党高步出遼夏墨浸天壤

深筆掃風雷勁絲綸帝載熙訓誥王言瑩諸公繼踵作互  
執造化柄黃山與黃華雙鳳高躋蹬清風玉樹鳴千古一  
輝映有若閑閑公光彩璧月恒雲煙恣揮灑乾坤快歌詠  
亶亶金聲鏗矯矯銀鉤硬楊馮李雷麻嶷萼胥倡應五行  
連麗天四海望而敬偉哉遺山老青雲動高興文林剗荆  
棘翰府開蹊徑秋空玉琴張搏拊分雅鄭三閭一曲歌忽  
喚劉伶醒哀哀汴蔡亾六合爲懸磬此老獨巍然聲價駭  
羣聽振袂凌孤霞珠璧飛欬警人宗一代文天賦百年盛  
紛紛夸毗子捫撫爲訾評自謂人勝天詎知天已定行行  
野史成共爲天下慶作噩建子月投我以照乘郢屋驚見

斗寒焰忽蟠互經也生已晚不獲拜先正窮閭一束書十  
載成墮甌學問苟有歸貧窶安足病今乃得溟渤問津有  
龜鏡挈我登龍門縷我出虎奔搖搖風中旌茲始見依憑  
緬思先世澤於今果無竟嗚呼世道喪欲語寒淚迸何時  
倒銀漢與世開窺詭昂頭冠三山俯瞰旭日晟陸海闢文  
源生民共涵泳

壽元內翰

秋風颯颯吹庭梧長庚吐焰橫太虛遺山先生曳長裾醉  
鞭黃鶴來天隅蹴開化窟肆搜取玉斗倒瀉明月珠九原  
呼屈原底事爲焦枯青雲問李白佳句今何如百年元氣

一杯酒千丈光輝萬卷書高卧一曲歌聲價百禩  
礫雲璈宮徵奏玉宇春鶯花柳鳴天衢惜哉時不與命偶西周削  
弱爲東都明堂一柱入樵採安得致主爲唐虞遺山山頭  
有舊廬歸來亦足爲歡娛既有墮地風雲之驪駒又有竹  
花弄語之鸚鵡仰天一笑萬事足倒騎箕尾遊蓬壺

辨磨甘露碑

國賊反城自爲功萬段不足仍推崇勒文頌德召學士滹  
南先生付一死林希更不顧名節兄爲起草弟親刻省前  
便磨甘露碑書丹卽用宰相皿百年涵養一塗地父老來  
看閭流涕數樽黃封幾斛米賣卻家聲都不計盜據中國

責金源吠堯極口無覩顏作詩爲告曹聽翁且莫獨罪元  
遺山

游華山寄元裕之

趙秉文以下  
見滄水集

我從秦川來徧歷終南游暮行華陰道清快明雙眸東風  
一夜橫作惡塵埃咫尺迷崑幽山神戲人亦薄相一杯未  
盡陰霾收但見兩崖巨壁插劍戟流泉夾道鳴琳瑯希夷  
石室綠蘿合金仙鶴駕空悠悠石門劃斷一峰出婆娑石  
上爲遲留上方可望不可到崖傾路絕令人愁十盤九折  
羊角上青柯平上得少休三峰壁立五千仞其下無址旁  
無儔巨靈仙掌在霄漢銀河飛下青雲頭或云奇勝在高

頂腳力未易供冥搜蒼龍嶺瘦苔蘚滑嵌空石磴誰雕鏤  
每憐風自四山而下不見底惟聞松聲萬壑寒颼颼捫參  
厯井到絕頂下視塵世區中囚酒酣蒼茫瞰無際塊視五  
岳芥九州南望漢中山碧玉簪亂抽况復秦宮與漢闕飄  
然聚散風中漚上有明星玉女之洞天二十八宿環且周  
又有千歲之玉蓮花開十丈藕如身五鬣不朽之長松流  
膏入地盤蛟虬采根食實可羽化方瞳綠髮三千秋時聞  
笙簫明月夜芝輶羽蓋來瀛洲乾坤不老青山色日月萬  
古無停輶君且爲我挽回六龍轡我亦爲君倒卻黃河流  
終期汗漫遊八極乘風更覓元丹丘

寄裕之

久雨新晴散瘴頑一軒涼思坐中間  
樹頭風寫無窮水天末雲移不定山  
宦味漸思生處樂人生難得老來閑  
紫芝眉宇何時見誰與嵩山共往還

繫舟山圖

裕之先大夫嘗居此山之東巖

山頭佛屋五三閒山勢相連石嶺關  
名字不經從我改便稱元子讀書山

李平甫爲裕之畫繫舟山圖閑閑公有詩某亦繼作

楊雲翼以下見中州集

名利走朝市山居良獨難况復山中人  
讀書不求官東巖



有佳致書室方丈寬彼美元夫子學道如觀瀾孔孟澤有  
餘曾顏膏未殘向來種德深直與山根蟠之子起其門孤  
鳳騫羽翰計偕聊爾爾平步青雲端榻來遊京師士子拭  
目觀禮部天下士文盟今歐韓一見折行輩殆如平生歡  
舞雩詠春風期著會點冠五言造平淡許上蘇州壇我嘗  
讀子詩一唱而三歎世人非無才多爲才所謾高者足詆  
訶下者或辛酸吾子忠厚姿不受薄俗謾晴雲意自高淵  
水深無湍他日傳吾道政要才行完會使茲山名與子俱  
不刊

子端山水同裕之賦

李純甫

遼鶴歸來萬事空  
人間無地著詩翁  
只留海岳樓中景  
常在經營慘淡中

馬圖同裕之賦

韓筆定襄霍  
益之家物

天馬飛來不苦難  
雲屯萬騎開元閒  
太平有象韓生筆  
曾見真龍如此閑

書懷繼元弟裕之韻四首

趙元

蒼龜不須問我命  
只自知多生墮  
宿業世網纏  
繇之驂騑受羈銜  
大笑跛鼈遲  
跛鼈亦復笑  
縮首甘自卑  
何必參漆園  
物理本自齊  
檳榔可消穀  
志士常苦飢  
穆之萬人雄  
猶不免此譏  
我懦更多病  
區區欲何爲  
鍾鼎不可倖  
藜藿分

所宜安能如黃蜂爲人填蜜脾清白儻少污後人何所貽  
初學悔大謬篆刻工文辭年來厭酸鹹淡愛陶潛詩愛詩  
固自佳其如未忘機回頭四十年言動俱成非誰能逐世  
利日久常規規惟當種溪田與子長相期

窗扉有生意山閒春到時長安冠蓋塵游哉不如茲西疇  
將有事老農真吾師不見元魯山夢寐役所思遺山乃其  
後僻處政坐詩時復一相過照眼珊瑚枝寄書多攜來爲  
子臥聽之

少從白衫遊氣與山崢嶸一念墮文字腸腹期拄撐多機  
天所災室暗燈不熒拈書枕頭睡鼻息春雷鳴泰山與鴻

毛何者爲重輕蹄涔與渤澥誰能較虧盈如能平其心一切當自平

嵩箕有竒姿出雲何悠然雲山足佳處留客今幾年有子罷讀書勤種山閒田粟里愧淵明香山慙樂天二老已古人相望雲泥懸得酒邀月來對影空自憐攝衣欲起舞稚子不須牽

次韻答裕之

薄暮敲門喜客佳水萍風絮共天涯行藏一話傾心肺古律三詩淬齒牙朱研不妨閑度日青山終得共食霞扶持老病須君輩滿地豺狼萬里家

寄裕之二首

汨沒兵塵滿鬢霜  
買鄰心樂古清涼  
閒陪老秀春行脚  
悶欠臞元夜對牀  
正欲脫身求兔窟  
誰能隨世轉羊腸  
南陽未比嵩陽好  
滿眼交游卽故鄉

老懶愚軒百不能  
飽諳人意冷於冰  
清狂舊日耽詩客  
灰朽而今有髮僧  
夢裏紙衾三丈日  
話延雪屋一龕燈  
新開一徑通蘭若  
斬盡清涼舊葛藤

次韻裕之見寄二首

魚入深淵鶴在陰  
飛潛何幸遠庖廚  
乾坤萬里雲無迹  
冰雪三冬柏有心  
故國句留清夜夢  
歲華分付白頭吟  
莘川

擬作桃源隱共與青山閱古今

古屋颼颼四壁塵不堪幽獨作吟呻  
瓶儲看客常年慣家具爲農近日新  
世味飽嘗惟可陞詩情漫苦不醫貧  
相從分我西山半欲乞臞元伴老身

題裕之家山圖

繫身盤盤連石嶺牧馬澍澍倒山影  
山光水氣相混涵中有元家舊廬井  
雁門一開豺虎場駕言投迹嵩之陽  
青山偃蹇不可將十年竟墜兵塵黃  
東巖風物知猶在說與寄庵神已會  
一揮淡墨能似之清輝遠寄形骸外  
元家故山吾與鄰夢見不如畫圖真  
舊曾行處聊經眼未得歸時亦

可人

同裕之再過會善有懷希顏

馮璧

寺元魏離宮十日來凡兩前與髯卿偕齋奠少林往其時  
已薄暮諸勝不暇訪今同魏諸孫再到風煙上寺僧導升  
殿雄深肅瞻仰柱礎門限帖追琢成大壯不見磨琢痕瑩  
渴明澗助摩挲三嘆息後世無此匠晚登西南亭碧玉對  
千丈如玉官天柱如太華仙掌畱宿贊公房秀色夢餘想  
夜靜耿不眠泉溜琴筑響惜暮今不來聯詩共清賞

贈裕之

麻九疇

向來三度見君詩常望西山有所思誰料并州天絕處相

逢梁苑雪消時  
賢人樂古聲  
猶在聲叟文  
高世豈知只恐  
神嵩不畱客  
秦川如畫渭如絲

元裕之以山遊見招兼以詩四首爲寄因以山中之  
意仍其韻

石華政可採負我孤身逢胡爲紅塵裏擾擾槐安宮  
山閒綠蘿月一照千巖空  
洪崖去不返清遊誰與同  
空餘松根泉雜佩流無窮  
人心墮泥滓不如與天通  
舉頭視霄漢浩露洗心胸

日月兩角蝸天地一粒粟  
老盆可徑醉豈擇瓦與玉  
大笑區中人朱門勾梁肉  
清曉登少室日夕眺王屋  
紫煙晞我



髮碧霞貯我腹溪中有白雲萬事付濯足物物愜幽情不  
獨蘭與菊

南風入桂樹高葉碧崢嶸舉手戲攀折上與雲煙撐黃金  
閒白玉徧地光晶熒笙簫坐閒發鸞鶴空中鳴浩歌山谷  
應起舞衣裳輕一尊后上酒如我浩氣盈目送飛鴻盡青  
雲萬里平

國風久已熄如火不再然流爲玉臺詠鉛粉嬌華年政須  
洗妖冶八駿踏芝田青苔明月露碧樹涼風天塵土一一  
盡象緯昭昭懸寂寥抱玉辨爭競搖尾憐幸有元公子不  
爲常語牽

同裕之欽叔分韻得莫論二字二首

雷淵

幼安謝辟命子雲老寂寞趨嚮豈獨異時命非所度我久  
困流離一塵求負郭雖無斬敵功尙舉力田爵崧少啟吾  
封四履盡伊洛有客來問津醉眼入寥廓

世事久閉眼終日只睡昏清風何處來佳客已在門倒屣  
往從之玉色向我溫妻孥趣作具歡喜傾瓶盆清夜襍被  
往共就遺山元嘲謔及俳語發揮閒微言懸斷漏天樞高  
嘯驚鄰垣脗合政相和意到俄孤鶩恨不倒困廩矧留  
籬樊棄屨獲珠玉披榛見蘭蓀我肱已三折醉墮偶全渾  
知無適俗韻量力任灌園二君清廟器巾幘華鬢尊蒼生

望休息朝廷待崇尊出處既異途會合難預論此樂未易  
得此夕勿憚煩白酒舉初子黃雞溷諸孫水樂喧後部山  
鬟秀前軒一醉萬事休商聲滿乾坤

玉華山中同裕之分韻送欽叔得歸字

洗耳潁川水療饑西山薇山川得佳客草木生光輝末路  
風教薄此道日已微相期千載事非君誰與歸

九日登少室絕頂同裕之分韻得蘿字

閒居愛重九佳人重相過登高酬節物少室鬱嵯峨迤邐  
謝塵土夷猶出煙蘿歛如據鰲頭萬壑俯蜂窩浩浩跨積  
風瀾瀾渺長河日車昃紅輪天宇凝蒼波指點數齊州始

覺氛埃多我無倚天劍有淚空滂沱驚鱗盼奧渚倦翼占  
危柯悔不與家來結茅老巖阿歸途睠老眼廣武意如何

次裕之韻兼及景立弟

名腸相掀半成灰戰退紛華旆始迴文字喜逢脩月手津  
梁愧乏濟川材等閒有酒輒共醉信口哦詩不置才最憶  
平生劉子駿紫芝可惜不偕來

玉華谷同希顏裕之分韻得秋字

李獻能

玉龍落峽噴飛流空翠霏霏晚不收輭腳山堂一壺酒暮  
涼閑對兩峰秋

滎陽古城登覽寄裕之

突兀高臺上古城登臨人境兩崢嶸關河落日歲云暮草  
木臨風氣未平虎擲龍拏王伯事天荒地老古今情一杯  
欲洗興亡恨爲喚窮途阮步兵

送裕之還嵩山

王渥

高懷不受簿書侵清潁鷗盟欲重尋老去宦情知我薄閒  
來道念見君深對牀夜雨他年夢滿馬西風此日心嵩頂  
勝遊誰得其伴聞仙馭待知音

末句用古  
仙人詩語

遊丹霞下院同裕之鼎玉分韻得留字

霜落豐山白水收歲華全在竹園頭賦詩鞍馬慙真賞載  
酒林泉阻勝遊野色自隨人意遠夕陽應爲鳥聲留仙源

回首旌旗隔一笛西風喚客愁

丹霞下寺土人以竹園頭名之

送裕之官鄧下兼簡仲澤

崔遵

青燈別酒夜沈沈力負相思自不任  
閑裏更誰留我醉興來無復伴君吟  
一枝仙桂知難擬千頃黃陂未厭深  
爲向荆州王粲道安排佳境約相尋

和裕之二首

行李西來便得君相從回首七經春  
君方備悉原思病我亦私憐仲父貧  
底事卻成今日別枯腸難著此愁新  
鳶肩火色真將驗馬虎何勞更問辛

不幸還能作幸民十年同醉潁川春  
酒船載我雖堪老仕

路有時或爲貧少室山人三日惡夷門紙價一番新益知  
哀樂終年事未唱驪駒鼻已辛

題裕之家山圖

劉昂霄

萬里神州劫火餘九原夷甫有餘辜作詩爲報元夫子莫  
倚家山在畫圖

贈答史院從事

賈益謙

見說才名是妙年多慚政府舊妨賢物華天寶無今古鳳  
閣鸞臺孰後先鄭圃道尊何敢望濟南書在子當傳莫言  
老眼昏花滿及見風鵬上九天

送裕之往許州酒閒有請子歌渭城煙雨者因及之

辛  
愿

白酒留分袂青燈約對牀  
言詩真謾許知己重難忘  
爽氣虛韓岳文星照許昌  
休歌渭城柳衰老易悲傷

寄裕之

青雲一別阮家郎甚欲題詩遠寄將  
好句眼前常蹉過佳  
人心上不曾忘誰家秋月茅亭底  
何處春風錦瑟旁  
昌谷煙霞久寂寞歡遊還肯到三鄉

古月一篇爲裕之賦

李汾

古月天不收敵君三萬秋天孫弄明鏡  
光湧雲閒流憶昔  
放逐江南州金陵女兒歌權謳草裏烏紗巾  
散著紫綺裘



酒酣把玉笛直欲捫參厯井騎斗牛醉中呼兒搖雙舟吾  
欲乘流下石頭起來茫茫視八極萬里只有元丹邱丹邱  
子遊人閒風塵何爲往復還玉華山人近招我九日朝帝  
蒼梧山

讀裕之弟詩藁有鶯聲柳巷深之句漫題三詩其後

兄敏  
之

阿翁醉語戲兒癡說著蟬詩也道奇吳下阿蒙非向日新  
篇爭遣九泉知

鶯藏深樹只聞聲不著詩家畫不成慙愧阿兄無好語五  
言城下把降旌

傳家詩學在諸郎剖腹留書死敢忘先人臨終有剖腹留書之語背上

錦囊三箭在直須千古說穿楊

跋遺山墨迹

劉因見容城集

晚生恨不識遺山每誦歌詩必慨然遺墨數篇君惜取注家參校有他年

遺山先生挽詩

閻復見元詩

蕭寺秋風捲玉荷月明人影共婆娑誰知別後驪駒曲便是先生薤露歌野史夜寒蟲蠹簡錦機春暖鳳停梭祇應前日西州路常使羊曇忍淚過

題中州詩集後

家鉉翁見元文類

世之治也三光五嶽之氣鍾而爲一代人物其生乎中原  
奮乎齊魯汴洛之間者固中州人物也亦有生於西方奮  
於遐外而道學文章爲世所宗功化德業被於海內雖謂  
之中州人物可也蓋天爲斯世而生斯人氣化之全光岳  
之英實萃於是一方豈得而私其有哉迨夫宇宙中分南  
北異壤而論道統之所自來必曰宗於某言文脈之所從  
出必曰派於某又莫非盛時人物範模憲度之所流衍故  
壤地有南北而人物無南北道統文脈無南北雖在萬里  
外皆中州也况於在中州者乎余嘗有見於此自燕徙而  
河閒稍得與儒冠縉紳遊暇日獲觀遺山元子所哀中州

集者百年而上南北名人節士鉅儒達官所爲詩與其平生出處大致皆采錄不遺而宋建炎以後銜命見留與留而得歸者其所爲詩與其大節始終亦復見紀凡十卷總而名之曰中州集盛矣哉元子之爲此名也廣矣哉元子之用心也夫生於中原而視九州之人物猶吾同國之人生於數十百年後而視數十百年前人物猶吾生並世之人片言一善殘編佚詩搜訪惟恐其不能盡余於是知元子胸懷卓犖過人遠甚彼小智自私者同室藩籬一家爾汝視元子之大度偉識溟滓下風矣嗚呼若元子者可謂天下士矣數百載之下必有謂余言爲然者

續增

讀遺山詩四首

劉秉忠字仲晦見藏春集

劍氣從教犯斗牛  
百川橫放海難收  
九天直上無疑滯  
更看銀河一派流

北里笙歌勸酒杯  
南鄰門巷冷如灰  
秋風萬里方搖落  
叫殺孤鴻春不同

青雲高興入冥搜  
一字非工未肯休  
直到雪消冰泮後  
百川春水自東流

雲霞閃爍動霓旌  
鞞旆征輦震地聲  
千里折衝歸指畫  
將壇孫子獨論兵

追挽元遺山先生

王恽字仲謀  
見秋澗集

文奎騰彩憶光臨孺子何知喜嗣音

子年廿許以時文贊於先生公喜甚親爲

刪誨且有文筆重於相權泰山微塵之說卽欲挈  
之西行以所傳畀子以事不克至今有遺恨云 党趙正

傳公固在陽秋當筆我奚任天機翻錦餘官樣月戶量工  
更苦心野史亭空遺事墜荒煙埋恨九原深

元遺山先生集附錄終



元遺山先生集補載

讀書山房刻本

烏程施國祁北研輯

平定張穆身齋補輯

密國公壽得友人書詩一首

以下見中州集

聞有書來喜欲狂紫芝睂宇久難忘別離惟歎我頭白詩句屢成君馬黃公幹羈栖猶洛下孔明高臥尙南陽冷官領取閒中趣遠勝區區夢蟻忙

麻徵君九疇松筦同希顏欽叔裕之賦一首

犧尊青黃災木命羈絆剪剔傷馬性折松爲筦得之天此君幸免戕殘橫初緣形似有代無不料奇功乃差勝人間



斤斧不須勞坐中活火鳴笙簫千秋蟄骨養霜雪一日奮  
鬣翻雲濤巖烟擊拂殷雷起顛風蹴踏銀山高莫嫌勺水  
懦無力如捲西江都一吸借汝歲寒姿扶我衰朽質埽除  
幻夢不到眼洗刷埃霾下胸臆捫霞直與羨門期一笑桑  
田海波白

雷御史淵洛陽同裕之欽叔賦一首

日上煙花一片紅嵩邙西峙洛川東才聞候騎傳青蓋又  
見牽羊出絳宮事去關河不橫草秋來陵寢但飛蓬書生  
不柰興亡恨斗酒聊澆魄扁胸

又啟母后同裕之賦一首

千古崩崖一罅開，強將神怪附郊禰。  
無情頑石猶胎謗，貝錦從爲巷伯哀。

秦略同希顏裕之賦樂真竹拂子一首

覓箇龜毛抵死難，直教擊碎釣魚竿。  
世人不用生分別，信手拈來總一般。

劉昂霄中秋日同辛敬之魏邦彥馬伯善麻信之元裕之燕集三鄉光武廟諸君有詩昂霄亦繼作一首

積甲原頭漢闕宮，登臨還喜故人同。  
超超萬里乾坤眼，凜凜千年草木風。  
今古消沈詩句裏，河山浮動酒杯中。  
極知

勝日須轟飲更待銀盤上海東

又送裕之往洛陽兼簡孫伯英一首

洛水嵩山壽樂堂每從熱惱得清涼  
竹牀石枕應無恙尙可分風供十方

又同敬之裕之游水谷分韻賦詩得荷風送香氣五  
字各賦五首

招提有勝踐日暮一經過何物媚游人  
微風動池荷尋幽意自愜況與佳人同俗物  
不到眼談笑來天風敲門看脩竹重理舊年夢  
上山復下山清風管迎送寒泉漱雲根湛然涵鏡光  
誰知一滴味中有曹溪香

迂辛與驪元得句猶有味頽垣斂暝色深竹貯秋氣

田紫芝夜雨寄元敏之昆弟一首

醉夢蕭森蝶翅輕一鐙無語夢邊明  
虛檐雨急三江浪老木風高萬馬兵  
枕簟先秋失殘暑湖山徹曉看新晴  
對牀曾有詩來否爲問韋家好弟兄

王萬鍾寄關中句一聯

千里呂安思叔夜二年社燕伴秋鴻

趙吏部伯成元弟以所業見投賦詩爲贈一首

耆舊隔存歿爲君重歎嗟人門得嵇紹  
文賦見張華夙有凌雲筆方乘犯斗槎  
忘年卽吾友未可論通家

康司農錫按部南陽有贈詩一首

魯山佳政霑鄰邑白水歡謠見路人縣務清談君自了農  
郊夙駕我何勤星河直上冰輪轉桃李前頭玉樹春海宇  
疲民望他日草堂那得遽移文

王中立題樂府後詩一首

常恨小山無後身元郎樂府更清新紅裙婢子那能曉送  
與凌煙閣上人

張仲升寄人宰縣詩一首

縣務無難易人才自異同割雞良暫屈製錦要專工積弊  
姦賊後遺黎喘汗中不存憂世志底用讀書功嫉惡看平

日知君有古風莫教循吏傳獨載魯山翁

白君舉酬詩一首

見茅亭詩

夢裏薰風湛露歌  
花開漢苑舊經過  
拾遺老去青春暮  
司馬歸來白髮多  
橫梁賦詩吾豈敢  
短衣扣角夜如何  
相逢未盡相思話  
草色連雲水碧波

貽溪麻革寄詩一首

以下見河汾諸老詩

卜高不學人問詩

朔雲陰雪晚重重  
日入寒蕪塞草空  
沂水東回無去翼  
天山南斷有哀鴻  
三年遠別交情外  
一夜相思客夢中  
明日關河對雙淚  
祇將幽憤寄秋風  
日孤寒水怒  
林風黃金  
兌齋曹之謙寄詩一首

詩到夔州老更工只今人仰少陵翁自憐奕世通家舊不  
得論文一笑同艸綠平原愁落日雁飛寒水怨秋風黃金  
鑛裏相思淚幾墮憑高北望中

又讀唐詩鼓吹詩一首

傑句雄篇萃若林細看一一盡精深才高不似人間語吟  
苦定勞天外心白璧連城無少玷朱弦三歎有遺音不經  
詩老遺山手誰解披沙揀得金

楊鵬飛卿送詩一首

見陶然集

三館才名天下聞亂來俗議漫紛紜兩朝文筆誰爭長一  
代詩人獨數君南浦春深愁送別西山晚翠約平分何時

竝坐龍潭上野水添杯看白雲

杜仁傑善夫病中呈詩一首

見善夫集

十載猶能復笑談歸來重覓讀書龕  
未陽白酒君應具句漏丹砂我自慚  
民訟幾何消自苦山城雖小得窮探  
也知清儉難持久好趁秋風醉菊潭

張澄仲經次韻詩一聯

見橋軒集

長松偃蹇千年物病鶴摧頽萬里心

楊奐浮生一首送裕之詩

見還山遺稿

漢節飛雲外秦城落照邊  
浮生空自老歸計定何年  
淚滿陳蕃榻心搖祖逖鞭  
短詩聊遣興羞向故人傳



耶律楚材和太原元大舉韻詩一首

見湛然居士集

魏帝兒孫氣似龍而今飄泊困塵中  
君游泉石初無悶我秉鈞衡未有功  
元氏從來多慷慨井門自古出英雄  
李唐名相沙堤在好與微之繼舊風

耶律鑄送元遺山行一首

見雙溪醉隱集

燕北秋風起幽光滿地開  
既邀今日別合道幾時來  
白玉煙沈閣黃金艸暗臺  
不須傷老大珍重掌中杯

郝經獲鹿新居哭元遺山詩一首

見陵川集

殘山繞荒城慘淡帶餘雪  
我來問新居欲語還哽噎  
搖搖識風旌掩掩淚隱睫  
額地升中堂痛激肝膽裂  
鼻若閭闔

風幽冥忽穿徹空牀一束書不見文章伯愁馬暗不鳴老  
僕頓欲絕嬌兒背面啼高弟展轉說有書未絕筆有傳未  
卒業靈輻已西州壯心空北闕緬思從公遊灑汗飛玉屑  
振筆青雲開炳烺寒電掣鯨吹濤山回隼厲霜鋒擊蘊情  
入輒語婉藹幽更切鶯啼柳陰深百轉春不歇方張大庭  
樂誰意成永別徒倚板庭柯窗戶轉寥寂乾坤入凋喪衣  
冠少顏色魂來暮山青魂去暮山黑城頭老畢逋底事悲  
破月中腸元易感使我心欲折首

王惲題遺山先生手書雜詩後一首

見秋澗集

文鍵親承警欬餘又從珠璧見遺書常疑落落江山筆不

放奎光到玉除

又中統五年六月初八日夜夢遺山先生指授文格

覺而賦之以紀其意一首

分明昨夜夢遺山指授文衡履絢閒道必細論能出理文  
徒相剽亦何顏江流不廢驚千古霧管時窺得一斑落月  
滿梁清境覺紫桐花露溼吟冠

吳澄題遺山鹿泉新居詩後二首

見草廬集

宋氏南遷金土中一時文物盛華風煌煌帝室龍興後流  
落遺山老禿翁

新居當日點新泉不見新居已舊篇一代風流今已矣空

餘心畫尙依然

何季穆讀遺山集詩一首

見列朝詩集

滄海橫流著此身中原天日照纍臣明昌大定三生夢欽  
叔希顏一代人野史亭中遺汗簡讀書山下起埃塵幽蘭  
灰燼今何在千載空餘老角巾

王士正讀金元詩一首

見精華錄

載酒西園追昔游畫闌桂樹古今愁蘭成賸有江南賦落  
日青山望蔡州

趙翼題遺山詩一首

見歐北詩鈔

身閱興亡浩劫空兩朝文獻一衰翁無官未害餐周粟有

史深愁失楚弓行殿幽蘭悲夜火故都喬木泣秋風國家不幸詩家幸賦到滄桑句便工

日吉朱雲駿春日游讀書山懷元遺山先生四首

以下見江蘇詩

徵

春煙澹欲流禽聲導客往山行曲愈好步窘勢轉上徑斷溪橫橋冰消水平掌澗瀑懸山巔塵襟快滌盪游歷逮茲辰傳聞自疇曩流風如可親對鏡足欣賞

古人不可及非徒尙詞翰出處有本性此際良獨難高名震山斗事定待闔棺筮仕興定初天興列史官凋敝日益甚簪筆涕洟瀾國亾終布衣家訓傳南冠

性正氣亦正跌蕩雄幽并聲名世耳食知己惟一兄四十  
五年閒毀譽何轟轟習俗安汚流所葆遂不貞錙銖較利  
害俯仰隨重輕所以貴壁立君子豈好爭

職本任史官記注敢貽誤身師忽東狩國史請保護時相  
目以迂零落不復顧艱危野史亭貞節葆歲暮身在國史  
在豈難徇國祚吁嗟絳雲樓志但希遭遇

繆嗣寅題元遺山集後一首

英聲早歲震詞曹老擅詩壇一代豪夢裏華胥空想像眼  
中瓊島賸牢騷孤亭野史心同鄭籬菊南山迹異陶箕尾  
幸超塵世外爵羅終不累名高

翁方綱讀元遺山詩四首

見復初齋集

秀骨出天然非可學而至驚心動魄語抑豈堪屢試今人  
惑津梁惟思騁奇異又怯昌谷囊難憑儉腹致輒覺陸坦  
迤不及元雄恣猶如學坡詩莫喻其深祕城東一矮榻二  
楊同啟笥

乾隆己巳庚午閒日與立山衛圃誦遺山集

與光陰掣電過六十年前

事夢回橋南窗憬焉發深愧

淵明飲之逸太白飲之仙坡則欲兼之仙佛俱有焉以我  
讀坡詩竊疑未必然放翁之飲酒半壁澆江山各有沈摯  
處敢誰輕與軒遺山真嗜飲何處窺其源恂悅莫能名亦  
擬索真詮記與堯石語堯石笑不言飲中較之蘇離合夫

誰宣僅以飲酒論何礙詩足傳

遺山接眉山浩乎海波翻效忠蘇門後此意豈易言爾日  
讀坡詩胸有節制存元精貫當中耿耿與誰論我觀寶書  
品於褚斥籬籓蕭阮羊薄上遂擬探本根未審防澆漓如  
何追胚渾望古俯眾流興定之初元令人緬星漢峻極窮  
崑崙儻以質坡翁孰竟委與原秦晁諸君子恐未參妙門  
金翅擘滄溟金鍼度鴛繡何人望見之渺不露結構斂之  
入毫芒縱之恢宇宙軒軒非濤瀾錯采豈雕鏤所擬長沙  
帖抑非閣本舊又不以翻新本自伋興就象罔於元珠憑  
何超喫詬此祕非傲人正復難輕授精純義山真故在鄭



箋右

又書遺山集後詩三首

程學盛南蘇學北陸元二老脈誰傳紹熙正際明昌日南

北相望二十年

遺山生於明昌元年庚戌正放翁提舉武夷沖祐觀時二先生竟算同時未相見耳

江左休誇病鄴中撐霆裂月許誰同金源南宋分疆後天  
放奇葩角兩雄

驢背鍾山照眼青文章未合付熙甯誰知接續咸淳末始

泄精華釀六經

遺山卒後十五年虞道園乃生蓋自王半山詩由經腴出而未得其正耳

又知忻州汪君本直修元遺山先生墓詩一首

先生歿後五百年饗堂鼎建崇其阡古愚汪君知政本此

舉無愧於前賢繪圖作記寄示我我嘗從事年譜編鈔詩  
先訂顧秀野磨碑漫記劉神川繫舟巖屋不可到野史亭  
址誰留連今者披圖宛瞻拜墓門東北圍牆壞其堂三楹  
壁嵌石厚培兩序增新椽大書中州文獻字萬古奇氣光  
星躔堂前石人後墓道舊銘石乃堂東偏歸然特表詩人  
墓先生之志藉以宣其西孫曾祔祖考東巖隴城同氣聯  
五花之土土五丈墓前積土五方方五丈相傳先生葬時  
四方來奠者張幕於此畫花爲記今其  
地號五  
花棚云葬時故事今猶傳亭仍重築署野史幽窗疏雨疑  
潺潺耕讀還因起丙舍茲誦聲來繞墓田更因校刊先生  
集故家寫本尤精所是與年譜相印合使我狂喜磨丹鉛

燕趙慷慨悲歌氣金元著錄金石鐫一於先生詩中寓杜  
老之史坡之仙我寶先生兩石墨靈巖蹟並蘇門懸函書  
汪君名不朽郝經姜魏同墨緣門人郝經撰墓碣又門人魏初姜彧撰碑陰記寄  
書謝子共舊石附諸集譜坐縣延送迎神曲我其職春秋  
禮祀配管茲

又元遺山涌金亭詩石久翳不見今始訪知之以詩

寄輝縣令高君爲移置亭中一首

亭榜猶疑贗蘇筆亭歌是乃真蘇詩欽州馮生爲訪剔鄧  
川高侯重護持俱是蘇齋著錄手如見元子酒酣時太行  
元氣動真宰墨響迢然鸞鳳期

又書元遺山涌金亭詩石本一首

嗚呼河獄東乃在百泉側同幹太行來百靈供筆力時從  
史院出內鄉初奉職聊卜鹿泉居已喜龜墨食附掌孫公  
和袖手謝安石時事無可爲但坐看泉脈日光搖金沙激  
嚮叩空碧張杜麻數子可與豁胸臆鬱律突兀氣一吐于  
厓壁龍門傲純陀那復知僻稷安閑乃神秀正書始造極  
後來傅山輩欲近安可得長嘯出天地但恐河汾窄擊節  
公定聞青天月華白

又蘇門山涌金亭蘇書石本一首

我愛遺山亭壁句每懷坡老亭上書蘇蹟果隨元蹟到吾

齋豈謬云寶蘇太行迢迢照萬古百泉水涌金光鋪元子  
西來詫賓從蘇公北上軒眉須二百年閒一仰俯乾坤清  
氣誰吾徒想當元子坐臥此恨不孫阮相與俱山川激越  
發長嘯鸞歌鳳舞來招呼伊川修竹舊盟在洛城仿像先  
志居濟源艸堂結鄰里喬木臨水成畫圖此書尙是早歲  
筆春陽驅馬唐鄧初愛其人樂見其字跋泐其可  
辨者云爾此跋儻  
爲厓重摹秋澗詩雖不可見水怪瀉盡明月珠吾齋寶蘇  
拜蘇像想應元子配食乎學海尋原意寥闊料量偃筆良  
區區

又齋中與友論詩第三首

蘇學盛於北景行遺山仰誰與蘇黃後卻作陶韋想夏平  
貌姑射異彼適莽蒼每過木雞軒靜觀夜氣養勿放坡詩  
新始喻陶琴響輕言吹一呷頓使光萬丈離垢偈有無舉  
似記疇曩詩家真衣盍何如錢與蔣心餘爲堯石分校禮  
闡所得士故以北南  
雅及孟昭也然此一首  
實爲蘭雪學遺山而發

又元遺山靈巖題名云冠氏帥趙侯齊河帥劉侯率  
將佐來游好問與焉丙申三月廿五日題在党懷  
英篆書碑陰下有丙辰冬至日蓬山劉惠淵游靈  
巖詩丙辰卽明昌七年丙申是蒙古太宗八年是  
時遺山正在冠氏金亾之後二年也因手搨此蹟

卽借劉韻記之一首

党記劉詩託此傳驪珠廿七氣橫天濟南紀後干行淚野  
史亭邊一匊泉內翰相過應寄語邑侯同到亦良緣我來  
手挹芝英露不枉追攀淨土蓮

又讀劍南詩第八首

唐旣弗杜仿宋亦豈蘇擬曠蕩今古論筏喻云誰使扁落  
輪困氣造物端倪啟武夷領祠日明昌才出矣

宋光宗紹熙庚戌放

翁提舉武夷冲祐宮是年卽

金章宗明昌元年元遺山生二老雖未逢魄力略相似寄

託又不同何幸並吾几覩池雲一泓軒然可萬里後來言

格調辛苦徒爲爾海虞彙萬篇差勝錫山梓

常熟毛氏劍南詩集刻本

勝於無錫華氏  
刻元遺山集

泰山一豪芒劭庵麤料理

愚所校訂惟虞  
道園集甫有緒

印涉窮津涯庶從經術始

凌廷堪讀元遺山詩一首

見校禮  
堂詩集

神京喋血竟生還忍死重過石嶺關一寸秋豪成野史百  
年老淚灑空山身經北渡流離際才與東坡伯仲間文獻  
中州盡凋喪賴君大手記完顏

祁騫藻讀元遺山詩四首

見續  
亭集

吾道申韓已足羞衣冠况復語俳優柱天大手回元氣卻  
取朱弦屬柳州

白頭賸有南冠錄青簡孤懸野史亭破硯禿豪忙底事中



州留得氣英靈

雪香亭畔柳啼鶯  
汴水東流繞舊京  
玉軸龍文親眼見  
故應愁殺庾蘭成

冠山飛入湧雲樓  
更憶陽泉道院幽  
不是詩人感喬木  
霜林誰識故鄉秋

元史五則

趙復傳字仁甫德安人與人交尤篤分誼元好問文名擅一時其南歸也復贈之言以博溺心末喪本爲戒以自脩讀易求文王孔子之用心爲勉其愛人以德類若此

許楫傳字公度太原忻州人幼從元裕之學年十五以儒

生中詞賦選

閻復傳字子靖其先平陽和川人弱冠入東平學時嚴實領東平行臺招諸生肄進士業迎元好問校試其文預選者四人復爲首徐炎李謙孟琪次之

張德輝傳字輝卿冀甯交城人世祖在潛邸召見訪中國人材德輝舉魏璠元裕李冶等二十餘人壬子與元裕北覲請世祖爲儒教大宗師世祖悅而受之

郝天挺傳字繼先出于朵魯別族世著武功爲河東行省五路軍民萬戶天挺英爽剛直有志略受業于遺山元好問嘗脩雲南實錄五卷又注唐人鼓吹一十卷

谷音一則

杜清碧著

洛陽程自脩字忘吾性孝友讀書城東門翰林元裕之上其言行除禮部郎中自脩聞之棄家南去

靜脩遺文二則

劉因著

書饕餮圖後金臺田景延得古饕餮拱泉而垂腹羸其面而坐則人焉其下有若承盤者然河東元裕之爲之攷定其爲古器無疑也景延遂以劉敞呂大臨例而圖之其友郝伯常欲爲道然而不果而屬予

孝子田君表清苑孝子田君諱喜其子道童資高秀喜讀書遺山元公陵川郝公皆嘗爲詩文以美之

陵川集一則

郝經著

義士詩序丁巳春予入燕得義士一人焉曰晉古跌宕于搢紳閒聲名藉甚故得其人爲尤詳初以早失怙恃著道士服杖履去家觀覽山川交識名右王內翰白樞判魏靖肅元遺山一時名流皆爲之先後

元詩癸集癸壬一則

顧嗣立著

張志純號天倪子泰安埠上保人六歲能誦五經十二棄家入道居全真宮數十載道行超羣輩與元好問徐世隆杜仁傑游

秋澗集十二則

王惲著

遺山先生口誨遺山先生向與頤齋張公自汴北歸過衛  
先君命錄近作一卷三十餘首爲贄拜二公于賓館同志  
雷膺在焉先生略叩所學喜見顏閒酒數行命張鐙西夾  
曰吾有以示之先生憑几東面坐予二人前侍披所獻狂  
斐且讀且竄卽其後筆以數語擬其非是且見循誘善意  
而于體要工拙音韻乖叶尤切致懇每篇終不肖跪受教  
再拜起立夜向深先生雖被酒神益爽氣益溫言益厲覺  
泉蒙茅塞洒洒然頓釋如醉者之于醒萎者之于起也說  
旣竟先生復昌言曰千金之貴莫踰於卿相卿相者一時  
之權文章千古事業如日星昭同經緯天度不可少易顧

此握管銛鋒雖微其重也可使纖埃化而爲太山其輕也可使太山散而爲微塵其柄用有如此者況老成漸遠斯文將在後來汝等其勛毋替坐客四棟有惘然自失不覺映面發媿者旣而鼓動客去先生覆衾臥予二人亦垂頭倚壁熟睡及覺日上先生與客已觴詠久矣于是祛篋取一編書皆金石雜著授予曰可疾讀吾聽愜其音節句讀不忒顧先君字而謂之曰孺子誠可教矣老夫平昔問學頗得一二歲累月積鍼綫稍多但見其可者欲付之耳可令吾姪從子偕往將一一示而畀之庶文獻之傳罔隕越于下先君起拜謝不敢曰先生惠顧若爾何幸如之知王

氏且有人矣敢不惟命期于明年春當見先生于西山時  
歲甲寅春二月也後三十五載戊子冬十二月臘節前三  
日小子憚再拜謹述

題遺山手簡後公道存在上者惟恐士之不才公議廢當  
塗者惟恐士之有才此古今通病必然之理也昔程伊川  
與韓相維游許昌西湖坐閒有以書投韓者程視之蓋干  
進者也程曰相公亦令人求之邪況爾後乎宜其藩維棘  
鎖想玉堂如在天上也觀此帖者幸勿以遺山爲疑可也  
帝王鏡略序近讀遺山先生鏡略書所謂立片言而得要  
者也其馳騁上下數千載之間總理繁會數百萬言之內

駢以四言叶以音韻世數代謝如指諸掌

題元楊手筆後卷中諸公皆一時名勝先生俎豆其門諸賢樂與游者其以道義故也予早歲讀書蘇門尙及見之歲時吟咏于山水間彬彬然極承平時故家風味不知軒冕爲何物孰謂三十年後文物陵替而至于斯拊卷援豪豈勝慨慕

黃石祠詩注黃石公祠有詩云天□旣與赤帝子□□願師黃石公題曰騰騰老後復題曰兀兀翁騰騰老者楊紫陽也兀兀翁者楊飛卿也二公爭相謂已詩者數年遺山聞之曰詩則非佳爭之之意甚可一噓也



史天澤家傳北渡後名士多流寓失所知公好賢樂善偕  
來游依若王滹南元遺山李敬齋白樞判曹南湖劉房山  
段繼昌徒單侍講爲料其生理賓禮甚厚暇則與之講究  
經史推明治道

玉堂嘉話遺山常與張暉齋論文見有竊用前人詞意而  
復加雌黃者遺山曰旣盜其物又傷事主可乎一坐爲之  
絕倒

金清漳老人南宮人曾撰本縣二郎神廟碑遺山見之謂  
進士張和之有讀得行得之語

趙大中庸說嘗見遺山與張緯文相謔見碑文過俞曰遺

山又貨了一平天冠也

觀東坡與蒲資政傳正書并覓柿霜無核棗四帖後有張行簡董師中元遺山跋語

詩夢十一月十七日與兒輩祓除回就枕熟眠近四鼓夢與姜君文卿會歷下亭酒半酣姜歌鷓鴣曲壽子聲甚歡亮已而以遺山新舊樂府爲問子曰舊作極佳晚年覺詞逸意宕似反傷正氣姜以爲然予因賦詩以贈旣覺頗記一二因足成之其詩曰畫戟清香敞燕居分明夢裏到庭除恩醲故里縣車後錦爛秋鷹斂翮初細掉觥船浮酒海暫停銀管合纍珠賞音千古遺山曲堅意高歌要壽子

紀夢至元戊子八月十三日夜送真定姬仲實上路就枕  
熟睡夢在一雪後亭榭尙書張夢符宣慰信雲甫御史王  
子淵三人來訪坐久話及向在東平時游燕等事夢符衣  
一素練衫當膺畫名士像自遺山以下數人子卽題詩几  
上云不惜黃金買東絹丹青難寫是眞容因大噉曰此衫  
甚佳但到處長負一軸諸公行神也遂踏砌雪而散覺乃  
自占其夢復作一聯云想是隆江方大用故將賢彥貯胸  
中

河汾詩序一則

房祺作

近代詩人遺山元先生爲之冠先生太原人太原境與平

陽接河山勝概地土所宜習俗所尙古今人物不殊至如師友淵源文章正脈略與之等故河汾閒諸老與天下人材無讓麻貽溪與元老詩學無慊古文出其右公言也張石泉房白雲與元老游從南北者子颺子京二陳昆仲與元老或詩或文數相贈遺者遯庵菊軒有稷亭二段之目與元老相次登第者曹兌齋與元老同爲省掾日以文詩講議者或曰兌齋雲中應人也吾子列河汾之閒得無附會歟不然兌齋之先誠應人自客汴梁北渡居平陽者三十餘年發明道學爲文楷式指授後進桃李光輝盈溢其門或教授鄉里或宦達四方有二子叔舉季行文筆亦盛

傳而況狀元王公趙城人曹之外父也兌齋生而隱德光輝汾晉沒而邛壠在焉豈非吾鄉先生歟夫諸老之詩有淵深冲澹如陶柳者有豪放如李翰林劉賓客者有輕俗近雅如元白者有對屬切當如許渾者有騷雅奧義古風大章浸入於杜草堂之域者往年吾友楊君仲德議成此集不幸早世仲德有云不觀遺山之詩無以知河汾之學不觀河汾之詩無以知遺山之大不觀遺山河汾之作不知唐人諸作者之妙不觀唐人之作不知三百篇六義之深意予今纂錄自貽溪至兌齋凡八人得古律詩二百一首號曰河汾諸老詩集皞皞郝先生序文於前甚備不肖

繼言於後才識淺陋不能盡其蘊雖然吾鄉學者如林有能慕河汾之派觀是集者知所興起云大德辛丑歲二月望日橫汾隱者房祺序

信齋類藁二則

孔行素著

元遺山先生金末遭亂避兵行至一窮僻之所有古廟焉因假宿意謂明日將他之也忽更餘若有人聲自梁屋間出熟聽之聲愈清切問元先生曰先生博學強記吾常聞之矣試與學生一一問之如何先生曰某也學淺才疏然於世之經史亦嘗涉獵願子問之于是先問易次及書詩春秋四書及漢唐史之異同皆前輩所未攷者先生以己

意所見詳辨之其聲稱善曰先生真大才也惜乎不遇時也如此問答稍閒復曰先生得無飢乎先生曰雖飢亦無奈何其聲曰學生當與先生備之并裊褥進先生慎無疑而勿受也先生曰某雖不與子相識若神若鬼旣蒙問答復何疑焉其聲曰願先生稍出戶外當自備至于是先生出復進則皮耗飯羹畢具先生始甚怪之因自思曰受此亦豈有所害耶食旣而寢明日將行其聲又曰先生未可行學生當先往覘之須臾至曰兵事方熾不若就此爲善也居數日先生欲去其聲又曰先生可行矣然同某方則善先生曰某與子旣若是情好猶故人也今日生別或可

使某知子之爲何如人姓氏爲誰他日必思以報其聲曰  
學生非人也因見先生遭難故來相護耳旣欲相見面必  
待送數程擇一半壁窗處月明夜相見就別自此行數日  
無日不見報前途虛實者先生深以爲幸一日告前途可  
無慮矣學生當與先生別夜半月明其聲漸近先生倚窗  
立但見一虎特大斑文可觀拜舞而去先生常載此事于  
文集後至正庚子夏宗叔可道思言因備道其詳云

又溧陽同知州事保壽字慶長偉兀人寓常州常陪所親  
某人從車駕往上都回塗中遇二雁射其一至暮行二十  
餘里宿于帳房其生雁飛逐悲鳴于空中保壽及所親皆



傷感思家之念不忍食之明日早起以死雁擲去生雁隨  
而飛落轉輾悲呼若相問慰之狀久不能去其人遂瘞之  
時庚寅秋九月與余談及此已十年前事也因思元遺山  
先生有雁冢詞正與此同乃知雁之有義人所不及諺云  
雁孤一世鶴孤三年鵲孤一周時所以親迎奠雁豈無意  
乎

雪樓集一則

程鉅  
夫著

薛微之碑微之制行立言□□□然當世搢紳尊之曰庸  
齋先生日與女儿辛愿柳城姚樞稷山張德直太原元好  
問南陽吳傑洛西劉會淄川李國維濟南杜仁傑解梁劉

好謙講貫古學且以淑人

草廬集二則

吳澄著

題張仲默夢元遺山授詩法圖云張君未覺乃夢既夢乃覺恨我不識遺山翁耳

劉忠憲行狀公之父訓金朝河南省掾博學知名與太原元好問友

庶齋老學叢談二則

盛如梓著

張橘軒與元遺山爲斯文骨肉張云富貴倘來良有命才名如此豈長貧元改倘來爲逼人此爲子又云半篙溪水夜來雨一樹早梅何處春元曰佳則佳矣而又未安既曰

一樹烏得爲何處不如通作一句改一樹爲幾點王辰北  
渡寄遺山詩萬里相逢真是夢百年巫老更何鄉元改里  
爲死巫爲歸如光弼臨軍旗幟不易一號令之而百倍精

采

張寓齋相公少年與孫德謙于東平嚴侯府從元遺山讀  
書其歸也命二子送行及別求詩以東平二字爲韻孫得  
詩云鵲山一帶傷心碧羨煞孫郎馬首東公得詩云汝伯  
年年髮如漆看渠著腳與雲平孫竟不永年公之詩亦不  
知何人藏弄閱四十年公簽汴省分治揚州里人高山甫  
一日以元詩歸之公喜甚命予紀其事或者謂德謙詩有

煞孫郎語不祥如此則詩果有讖乎

歷城舊志一則

呂公祠云元遺山在太原有道人常邀同食且曰我家在濟南趵突泉上甚可樂也公能從我游乎元曰有待數年後遺山過濟南已忘前約矣游泉上倦臥灤源堂忽夢前道人揖之曰久約不相憶邪何咫尺不枉顧醒而始悟因起過北岸入祠中儼然坐上矣因爲重建此祠

山房隨筆一則

蔣平仲著

元遺山北方文雄也其妹爲女冠文而豔張平章當揆欲娶之使人屬裕之辭以可否在妹以爲可則可張喜自往

訪之覘其所向至則方自手補天花板輟而迎之張詢近日所作應聲答曰補天手段暫施張不許纖塵落畫堂寄語新來雙燕子移巢別處覓雕梁張悚然而出

張巖道園學古錄一則

虞集著

題程氏遺子元氏送女二詩云古君子將終則有啟手足之言非直示以神明不衰固以巫教也嫁女必有命嫁之詞非直情愛之鍾固以謹禮也河南侍御程公遺其子處士君之遺訓遺山先生送其女歸處士之嘉言蓋古道也處士君夫人上承兩家大人之傳以施諸子孫宜其文獻淵懿之不可及也

金石例一則

潘昂霄著

韓魏公祭式元遺山記其大略姑錄之古人書曾祖皇祖  
皇考魏公易皇以顯字顯曾祖顯曾祖妣顯祖顯祖妣顯  
考顯妣妻先亾曰顯嬪妻祭夫曰顯辟穆甫兄弟曰顯穆  
甫

四賢祠堂記一則

名臣事略引

初聶侯珪帥平定聞敬齋李公之名而賢之延至郡舍會  
遺山元公還太原過之爲數日留因追憶閑閑文獻二老  
作詩云百年喬木鬱蒼蒼耆舊風流趙與楊爲向榆關使  
君道郡中合有二賢堂聶侯起謝曰此珪志也方經始而

聶侯卒至元二年到侯天祿繼守是州爲屋數楹置楊趙  
元李四公像于中以事之惟閑閑文獻以道德文章爲一  
代宗師皆在禮部翰林對持文柄時號楊趙遺山敬齋皆  
二公門下自南都時才已相埒北渡後嘗往來西州寓志  
于文字閒更唱迭和世亦謂之元李海內之人識與不識  
往往誦其詩讀其書敬仰其人蓋所謂聞而不得見見而  
不得親者

說學齋稿一則

危素著

太行書院先賢祠記真定之屬縣獲鹿其里曰閭同國子  
伴讀高健實作太行書院以祠鄉先賢訪其遺像悉圖于

壁間晉中書舍人賈公緯及其曾孫宋左僕射昌朝金太  
常丞蔡公珪左司員外郎元公好問國朝御史臺侍御史  
張德輝江南行省參知政事賈公居貞翰林學士承旨王  
公思廉元公雖世居太原嘗買宅于獲鹿其女子又歸邑  
人故合祠于是又云蔡元兩公之奧學雄文震耀穹壤若  
王公之敦厚老成其學得于元公者固已盛傳于世

唐詩鼓吹序七則

趙孟頫云中書左丞郝公當遺山先生無恙時常從學詩  
公因人傳句釋使誦者見其指歸夫唐人之詩美矣非遺  
山不能盡去取之工遺山之意深矣非公不能發比興之



蘊此政公惠後學之心亦遺山哀序是編之初意云

武乙昌云國初遺山元先生爲中州文物冠冕慨然當精選之筆自太白子美外柳子厚而下凡九十六家取其七言律之依于理而有益於性情者五百八十餘首名曰唐詩鼓吹如韶章舉于廣庭百音相宣而雷鼗管籥實張其要眇也

盧摯云新齋郝公繼先注唐詩鼓吹集成命內翰姚公端父爲之序而屬摯跋于篇末唐詩鼓吹集者遺山先生元公裕之之所作公幼受學遺山嘗以是集教之詩律公慨師承之有自故爲之注

楊慎丹鉛總錄云唐詩鼓吹以宋胡宿詩入唐選宿在宋  
史有傳文集今行于世所選諸詩在焉觀者不知其誤何  
邪鼓吹之選皆晚唐之最下者或疑非遺山觀此益知其  
僞也

錢氏重刻序云唐詩鼓吹十卷相傳爲元遺山選次或有  
斥爲假託以爲遺山集中無一語及此選而遺山本傳紀  
載闕如是固不能以無疑予諦觀此集探珠搜玉定出良  
工詰匠之手遺山之稱詩主于高華鴻朗激昂痛快其指  
意與此序符合當是遺山巾箱篋衍吟賞紀錄好事者重  
公之名繕寫流傳名從主人遂以遺山傳也

陳霆兩山墨談唐詩鼓吹爲郝天挺箋注金有郝天挺者  
元遺山實師之史稱其早衰多疾厭于科舉不復充賦又  
云其爲人有崖岸耿耿自信甯困窮落魄終不一登豪富  
門然則此天挺乃金時隱逸也注鼓吹者署云中書左丞  
且謂嘗學于遺山之門然考諸元史其爲左丞在武宗時  
則知別一人也

王士正池北偶談金元間有兩郝天挺一爲遺山之師一  
爲遺山弟子子考元史郝經傳云其先潞州人徙澤州之  
陵川祖天挺字晉卿元裕之嘗從之學裕之謂經曰汝貌  
類祖才器非常者是也其一字繼先出於宋魯別族父和

上拔都魯元太宗世多著武功天挺英爽剛直有志略受業於遺山元好問累拜河南行省平章政事追封冀國公謚文定爲皇慶名臣嘗脩雲南實錄五卷又註唐人鼓吹集十卷元時漢人賜號拔都惟史天澤張宏範見輟耕錄漢言勇也近常熟刻鼓吹集乃以爲隱逸傳之晉卿而致疑於趙文敏之序稱尙書左丞又於尙書左丞上矣加金字誤甚

字誤甚

本東日所藏元人文集取誤無常元致問之卓卓

施國祁案是詩原本于金之郝天挺遺山撰墓銘云先生教之作詩卽此本也遺山復精選之以授元之郝天挺天挺因加注焉惟遺山不敢掠師之美而復嫌門弟子之名故集中無一語及之無可疑者卷中誤入宋胡宿等詩當時南北隔絕或有未詳郝注于胡宿下不立小傳亦曲全之義也又集中太白少陵皆不入選緣遺

山已有杜詩學一書而太白律詩甚少故也惜天一閣  
書目云遺山解注十卷刊本不及見而俗刻郝注殊陋  
至附廖氏解尤不堪寓目

餘冬序錄一則

何孟春著

葉文莊水東日記謂元人文集如馬祖常元好問之卓卓  
今皆無傳春按元好問金人也金亡遂不仕爲遺山集四  
十卷今刻河南祖常有石田集十卷今刻陝西

仲子集一則

胡翰著

服胡麻賦蘇文忠所作王子端所書詞翰非近人可比遭  
值兵火散逸不存今來太末復見此卷卷後有遺山題識  
以淵珠膏火之喻爲不可曉蓋金人傳寫誤以珠在淵作

在淵珠也獨未審膏火所喻耳

歸田詩話一則

瞿佑著

元遺山在金末親見國家殘破詩多感愴如云高原水出  
山河改戰地風來草木腥花啼杜宇歸來血樹挂蒼龍蛻  
後鱗白骨又多兵死鬼青山元有地行仙燕南趙北非金  
土王後盧前總故人皆寓悲愴之意至云神功聖德三千  
牘大定明昌五十年不忘前朝之盛亦可念也

復初齋文集一則

翁方綱著

右遺山先生涌金亭示同遊諸君子詩寸許正書詩內微  
茫散煙螺可證集本蘿字之誤也後題云乙酉清明日崧

陽王贊立石蓋補刻也先生宰內鄉在正大丁亥戊子間  
其宰南陽則在辛卯郝伯常表墓謂初筮仕除鎮平令再  
轉內鄉遂丁艱終喪正大中辟中州南陽令然先生鎮平  
縣齋感懷詩有四十頭顱半白生之句先生年四十當正  
大六年己丑爲罷內鄉之明年而郝序鎮平在內鄉之前  
誤也郝伯常生於元光二年癸未當先生令內鄉時伯常  
方六歲宜其所記有異辭矣

近日新刻陵川集本又訛  
以內鄉在南陽之後大誤蘇

門山陽皆縣名詩云山陽十月未搖落當是正大五年戊  
子冬罷內鄉出居縣東南日與張仲經杜仲梁諸人相從

紅梅盛開藉草嘯詠時也

歐北詩話五則

趙翼著

元遺山才不甚大書卷亦不甚多較之蘇陸自有大小之別然正惟才不大書不多而專以精思銳筆清鍊而出故其廉悍沈摯處較勝於蘇陸蓋生長雲朔其天稟本多英健豪傑之氣又值金源亾國以宗社邱墟之感發爲慷慨悲歌有不求而自工者此固地爲之也時爲之也同時李冶稱其律切精深有豪放邁往之氣樂府則清雄頓挫用俗爲雅變故作新得前輩不傳之妙郝經亦稱其歌謠跌宕挾幽并之氣高視一世以五言雅爲正出奇於長句雜言揄揚新聲以寫怨思金史本傳亦謂其奇崛而絕雕刻



巧縛而謝綺麗是數說者皆可得其真矣

蘇陸古體詩行墨間尙多排偶一則以肆其辨博一則以侈其藻繪固才人之能事也遺山則專以單行絕無偶句構思窅渺十步九折愈折而意愈深味愈雋雖蘇陸亦不及也七言律則更沈摯悲涼自成聲調唐以來律詩之歌可泣者少陵十數聯外絕無嗣響遺山則往往有之如車駕遁入歸德之白骨又多兵死鬼青山原有地行仙蛟龍豈是池中物蟣蝨空悲地上臣出京之只知灞上真兒戲誰謂神州竟陸沈送徐威卿之蕩蕩青天非向日蕭蕭春色是他鄉鎮州之只知終老歸唐土忽漫相看是楚囚

日月盡隨天北轉古今誰見海西流還冠氏之千里關河  
高骨馬四更風雪短檠鐙座主閑閑公諱日之贈官不暇  
如平日草詔空傳似奉天此等感時觸事聲淚俱下千載  
後猶使讀者低徊不能置蓋事關家國尤易感人惜此等  
傑作集中亦不多見耳

郝經作遺山墓誌謂其詩共五千五百餘篇爲古樂府以  
寫新意者又百餘篇以今題爲樂府者又數十百篇是遺  
山詩共五千七百餘篇乃世罕有其全集今所存者惟康  
熙中無錫華希閔刻本魏學誠作序謂其購得善本而鈔  
之卷首載元初徐世隆李台二序於元世祖仍擡起頂格

是必仿元初初刻本然詩僅一千三百四十首則所存者  
祇五分之一而已豈元初嚴忠傑等初刻時卽爲刪節邪  
抑華氏翻刻時刪去邪竊意遺山詩既有五千六七百首  
則其遭遇國變感慨滄桑必更有許多傑作而今祇有此  
數豈不可惜哉又遺山修飾詞句本非所長而專以用意  
爲主意之所在上者可以驚心動魄次亦沁人心脾今華  
氏刻本內第十三四卷率多題畫絕句別無佳思而郝經  
所謂五千餘首者竟不得睹其全矣不知世間尙有全集  
否當更求之

拗體七律如鄭縣亭子澗之濱獨立縹緲之飛樓之類杜

少陵集最多乃專用古體不諧平仄中唐以後則李商隱  
趙嘏輩創爲一種以第三第五字平仄互易如溪雲初起  
日沈閣山雨欲來風滿樓殘星幾點雁橫塞長笛一聲人  
倚樓之類別有擊撞波折之致至元遺山又創一種拗在  
第五六字如來時珥筆誇健訟去日攀車餘淚痕太行秀  
發睂宇見老阮亾來樽俎閒雞豚鄉社相勞苦花木禪房  
時往還肺腸未潰猶可活灰土已寒甯復燃市聲浩浩如  
欲沸世路悠悠殊未涯冷猿挂夢山月暝老雁叫羣江渚  
深春波淡淡沙鳥沒野色荒荒煙樹平青山兩岸多古木  
平地數峰如畫屏長虹夜飲海欲竭老雁叫羣秋更哀東

門太傅多祖道北闕詩人休上書之類集中不可枚舉然  
後人習用者少

遺山複句最多如懷州城晚望少室云十年舊隱拋何處  
一片傷心畫不成重九後一日作云重陽擬作登高賦一  
片傷心畫不成題家山歸夢圖云卷中正有家山在一片  
傷心畫不成雪香亭雜詠十五首內有云賦家正有蕪城  
筆一片傷心畫不成元都觀桃花云人世難逢開口笑老  
夫聊發少年狂同嚴公子東園賞梅云佳節屢從愁裏過  
老夫聊發少年狂此日不足惜篇就令一朝便得八州督  
爭似高吟大醉窮朝晡送李參軍詩內又有云就令一朝

便得八州督爭似綵衣起舞春斑斕桐川與仁卿飲一聯  
風流豈落正始後詩卷長留天地閒題梁都運所得故家  
無盡藏詩卷亦有此聯田不伐望月婆羅門引云兩都秋  
色皆喬木三月阿房已焦土存沒一首又云兩都秋色皆  
喬木一代名家不數人答樂舜咨云兩都喬木皆秋色耆  
舊風流有幾人東山四首有天公老筆無今古枉著千金  
買范寬胡壽之待月軒詩又有天公老筆無今古枉卻坡  
詩說右丞錢過庭烟溪獨釣圖綠簑衣底元真子不解吟  
詩亦可人息軒秋江捕魚圖又有綠簑衣底元真子可是  
詩翁畫不成臺山十詠內有云惡惡不可惡惡可未要雲

門望太平贈劉君用可庵二首內一首云惡惡不可惡惡可笑殺田家老瓦盆次首云惡惡不可惡惡可大步寬行老死休寄希顏末句共舉一杯持兩螯送曹壽之平水亦用此句作結此複句之最多者也

附存書目一則

續古今考九卷舊本題金元好問撰

案此書係後人僞託

山左金石志二則

長清縣五峰山崔先生像贊石刻無年月碑刻虛靜真人畫像上層像贊三首一爲元好問籀文一爲劉祁小篆一爲杜仁傑八分

五峰山重脩洞真觀碑定宗三年十一月立正書篆額文  
爲元好問撰王萬慶書孔元措篆額史稱好問爲文有繩  
尺備眾體今觀此碑平行無出色處或託名爲之末題歲  
次戊申爲定宗三年是年三月定宗崩碑立於十一月正  
朝廷議立未決時也

寰宇訪碑錄七則

楊振碑

元好問撰張日正書貞祐四年正月

陝西乾州

陳仲謙墓誌銘

元好問撰正書正大二年

山西臨晉

涌金亭詩

元好問撰正書無年月

河南輝縣

五峰山崔先生像贊石刻

元好問等各體書無年月

山東長清



五峰山重脩洞真觀碑

元好問撰王萬慶正書定宗三年十一月

山東長清

金御史程震墓碑

元好問撰李微正書中統四年七月

河南偃師

廉訪使楊奐神道碑

元好問撰姚燧正書中統五年四月

陝西乾州

山右碑目一則

吳式芬著

元好問王構弔馮大來副使詩

行書無年月

平定州

題名三則

金石萃編曲阜題名太原元好問劉浚明京兆邢敏上谷

劉翊東光句龍瀛蕩陰張知剛汝陽楊雲鵬東平韓讓恭

拜聖祠遂奠林墓乙巳冬十二月望日謹題書凡八行行

書左行

靈巖寺碑陰題名冠氏帥趙侯齊河帥劉侯率將佐來游  
好問與焉丙申三月廿五日題凡五行行書

寰宇訪碑錄古陶禪院元好問題名行書大德六年在山

西陽曲縣又靈巖寺詩碑

圓照撰  
正書

上角有元好問游四字

至元三十一年十月在山東長清

案二題皆爲  
後人補鑄者

帖印一則

墨緣彙觀墨搨定武五字損本蘭亭卷後押元遺山三字  
朱文印卷末鮮于太常題云右定武蘭亭玉石刻甲余平  
生所見者少況有內翰遺山先生圖記尤可寶也

施國祁元集箋注例言十四則

是集元刻爲嚴忠傑中統壬戌本張德輝類次詩文共四十卷前有李冶徐世隆二序後有杜仁傑王鶚二引書佚不得見考徐序有評樂府語則新樂府五卷當併入刻或別自爲卷至明刻乃削去

文淵閣書目十二冊菜竹堂目同絳雲樓目全集內閣藏書目

四十卷季滄葦目傳是樓目簡明目俱同儲氏附錄一卷內詩十四卷文廿六卷案國史經籍志云五十二卷

乃耳食之說不足據

明刻爲李叔淵宏治戊午本詩文仍四十卷有儲瓘李叔淵二序集中二十二卷元闕兩頁外附錄一卷乃儲氏從

中州等集採諸贈言訂入者何燕泉云遺山集今刻河南者卽此本也是書劉疏雨眠琴山館有之借校箋本如卷一

出京詩注史院得告歸嵩山寺下寺此又豐山懷自古南鄰雄

鄰此又二卷移運甕古城隈甕此又句自信頗相慤相此

又二十八卷大丞相碑有辨字又鄧州倉記差人之勞

不能給二人之食差此作十又三十一卷再略蒲鮮鮮此

集中藉以訂正者不可枚舉略指一二不備載

國朝刻爲華希閔康熙庚寅本詩文仍四十卷古賦四首

五古一百二十九首七古七十八首雜言三十六首樂府

四十八首五律八十四首七律二百九十三首五絕二十

五首六言四首五七言一共一千二百八十首大抵祖中

統而禰宏治者仍載附錄一卷及李徐杜王四序引削去

李儲兩序而弁以魏學誠大字序外增附錄詩五首此刻

盛行傳是樓所藏查初白所評趙蓉江所易趙雲松所說  
皆是甲辰歲從楊拙園夙好齋乞得卽小箋底本也

眠琴山館又藏元刻曹益甫至元庚午本有段成已序止

詩二十卷無文其詩亦一千二百八十首續採八十一首

五古十二首七古四首雜言三首樂府二首  
五律八首七律三十三首七絕一十九首此張德輝類

次所遺者三刻皆無今竝依類收入各卷後卽校箋本如

三卷覓古  
銅爵句應是杜康祠下得是此又四卷贈答  
作自又張仲文句疑作金荃

怨曲欄畹辭欄此又天涯  
作藺又山句斷岸何緣此天姥此此又陵川  
作比又西溪

圖詩自己造仙府自下此  
有謂字亦舉一二竝較今本殊勝藉以

改正不少文淵閣書目云詩三冊全棗竹堂目同國史目  
云二十卷天一閣同汲古閣目云八本附存書

目云二十卷案此本與下黃選刻皆二十卷未知諸目究  
係何刻○又此集丹黃滿紙爲西樵老人卽錢陸燦晚年  
評本如一卷箕山詩降衷均義稟四句直以腐語抹去十  
二卷雪香亭金水河頭好墓田句以爲唐張祐語妙在山  
光二字若襲改作河頭則無  
味評語頗中肯綮亦採入

從楊秋室假讀舊鈔元黃公紹至順庚午本詩二十卷僅  
七百餘首樂府次首卷餘略同有余謙序蓋選本也其移  
居八首注云元本止七首今仍之乃以故書堆滿牀句上  
接尙有百本書句爲一首豈知八首各用一韻無轉韻者  
誤也秋室云此集七律不載岐陽七絕不載論詩棄取已  
失當他何論邪亮哉斯言

查初白詩評卽華氏本如

五卷送陳季淵句

雪花茫茫揚白雪

改

作又七卷癸巳浮心白髮前改心又老樹不用若回家改若

沙同作除夜句八卷寄南餘歸計一廛新改南皆與舊本暗合惟

苦思又三卷崇寂寞來作由東鄰乃云由疑又半山亭前浙

江水乃云浙當其謬處未免失檢至八卷上馮蚤樾老歸

千里驥改蚤及詳益甫本竟係阜字蓋因傳刻者訛阜為

早而後校者復改早為蚤沿誤至此又十四卷壬五樹來

禽拾放花改拾及詳益甫本乃是恰字亦因傳刻本訛恰

作拾遂致改拾作十去本字愈遠矣古書固因不校而訛

亦有因校而益訛者初白尚不免此

本集三卷荆棘中杏花詩亦見謝枋得八卷新野先主廟

詩十卷蜀昭烈廟詩亦見元明善清河集又穎亭詩春風碧水二

語亦見張希孟會波樓詩皆誤也惟別本有聞鶯五絕一首似為

趙孟頫松雪齋集誤入者故不收補

集詩失載者本集寒食靈泉宴集序有五古一首集無小亭

集序有種松詩一卷有詩似非東游略記詩十首五卷游泰山一首十二卷龍泉

寺四首餘無超化詩注引殘句集無中州集五卷趙宜之書懷繼

裕之韻五古四首集無次韻答詩七律陰塵韻二首八卷止次陰韻

一首十卷追錄題下塵韻一首注云寄張子純非與趙作六卷麻知幾松筦同裕之賦

七古一首集無裕之以山游見招兼以詩為寄因仍其韻四

首集無雷希顏同裕之欽叔分韻得莫論二字五古二首集無



九日登少室絕頂同裕之分韻得蘿字五古一首七卷有太室同

賦五律一首非九日作洛陽同裕之欽叔賦七律一首九卷一首非和作次

裕之韻兼及景元弟灰韻七律一首九卷有示崔雷諸人詩而杯材韻不叶又

此自指雷伯威劉景元同裕之水谷分韻得荷風送香氣五絕五

首注云深竹貯秋氣裕之語集無○穆案此先生新樂府句歸潛志引昆

陽懷古句云英威未覺銷沈盡猶向春陵望鬱蔥集無靜修

遺文孝子田君表云有贈其子田道童詩集無歸田詩話引

句云花啼杜宇歸來一血樹掛蒼龍蛻後鱗集無不知何人句以上

皆失載者至庶齋老學叢談引贈張寓齋句云汝伯年年

髮如漆看渠著腳青雲平四卷示仲耽句圭齋集送振先歸祖庭

序引句云九原如可作我欲從歐陽

二卷移居句

藝林伐山引

句云北去穹廬千萬里畫羅休縷麝香金

十二卷雪香亭句

歸田

詩話引句云燕南趙北非金土王後盧前盡故人

十卷王仙翁句

皆屬錯記若居易錄引句云濟南山水天下無乃于欽句

詠歷山云濟南山水天下無晴雲曉日開畫圖見齊乘

更攷寰宇訪碑錄有涌金亭

詩刻在今河南輝縣者當卽

五卷示同游諸君作

又題超化寺詩刻

在今河南密縣者當卽

十一卷秋風嫋嫋作

本集中侯相雲溪圖題內載絕句一首賈氏千秋錄中口

號三首酒裏五言說中五古一首五詩皆不入題數元詩

凡一千二百八十首續採八十一首今補一首

歸潛堂詩  
○穆補弔

馮大來副使詩一首總一千三百六十二首郝銘所紀一千五百餘

首合諸失載篇什約有其數惟今華氏本所刊郝銘於一

千五百之一字訛作五字而雲松趙氏遂疑真有此數有

更求全集之語殆未及詳攷故邪

集文元闕者十五卷光武中興頌大司農箴二篇二十卷文儒

武君銘三十卷沖虛大師銘皆有銘無序二十卷教授常君銘

二十卷完顏良佐碑皆有序無銘四十卷南陽上梁文脫拋梁

詞六首又墓誌如承旨子政御史仲甯尙書仲平大理德

輝點檢阿撒郎中道遠省講議仁卿西帥楊沃衍奉御忭

哥宰相子伯祥節婦參政伯陽之夫人將軍長樂妻明秀

凡十二篇皆漆水公碑語今竝不存是也宏治刊本脫去

者二十卷中順張君碑脫一頁闕三百八十字銘詞後半闕兩行陽曲

周君表脫一頁闕三百四字○穆案脫頁今補完見金石例補得一十七

字是也

先生文字散見他處自類次後未經收入者若漆水郡侯

耶律公墓誌銘遼史百官志引其語尙書右丞耶律公神道碑文集中

與成仲書所云先相公碑二篇見元文類安肅郝氏塋碑文殘本見金

石例楊振碑文殘本見石刻意增五十六字傍注跋閑閑草書和擬

韋詩後見墨跡今已依類採補各卷後惟秋澗集云有題

東坡與蒲傳正四帖跋及寰宇訪碑錄所載陳仲謙墓誌

銘正書正大

二年立在今山西臨晉縣五峰山重修洞真觀碑王

慶正書元定宗

三年十月立五峰山崔先生像贊石刻

各體書無年月立在今

山東長清縣者皆無由採輯矣

嘗讀虞道園學古錄所載曾巽初墓銘云補注遺山詩一

十卷藏于家蓋古人已有先我而爲之者第云補注則必

有作于前者又言藏于家則此注似未行世不得與李季

章荆公施武子東坡

任子山山谷

等注竝傳惜哉願茲末

學乃從數百年後劫灰盜竊之餘徵文攷事表而章之未

知有當于先正否

金源史事僻左自元及明止有浙本流傳絕少國史且然

況文人家集乎惟遺山先生詩文大家傑出金季爲一代  
後勁上接杜韓中揖歐蘇下開虞宋其精光浩氣有決不  
可磨滅者是以歷朝傳刻不絕第集中本事非他書取證  
不詳積年以來遐搜博采自四史外如中州集續夷堅志  
歸潛志拙軒集淦水集滹南集莊靖集鶴鳴集二妙集河  
汾諸老詩敬齋古今薙及諸宋人

齊東野語庶齋老  
學叢談山房隨筆元人

湛然集還山遺藁東游記陵川集秋澗集玉堂嘉話丁亥

集續集靜修集詩文拾遺皇元風雅元文類名臣事略圭

齋集牧庵集困學齋雜錄金臺集河朔訪古記谷音雪樓

集道園學古錄剡源集草廬集齊乘淵穎集輟耕錄梧溪

集名儒草堂詩 明人 說學齋藁潛溪集

餘名山游記 忠文集升庵集 等書約十之一雜

書又二百餘種不及備載大半山館中物裒而箋釋之庶

幾游覽贈答之篇慷慨歌謠之作稍可攷見惟是屈平之  
悲楚澤庾信之哀江南古有闕疑未獲訂正況乎書多秘  
籍實難購募而已已寓災所鈔副本又一炬而空其挂漏  
亦良多矣至于詩中故實不過諧俗文字先生繁稱博引  
尤非儉腹所可及偶爲友人慫恿復聚書冊匆匆解注七  
月而成竊恐雲階月地載失周秦玉盃金桃事迷紀傳不  
更貽笑于大方之家乎張半屏蔣枕山兩君雅共商榷有  
意續補之謹識此以俟

先生手錄詩冊似不甚排當其閒前後失次并有書追錄  
字者大小不等已無例可沿及頤齋類次又將古今體分

編顛竄尤甚是以鄙附箋注隨題載入悉遵舊本不敢言  
例

沈垚跋施箋元詩一則

此我鄉老儒施北研先生之所箸也先生又有遺山文集  
箋注先生歿後蔣君枕山謀并刻之正欲鳩工枕山遽病  
卒卒後垚婁至其家求先生遺書不可得先生孰于金源  
掌故所箸有金史詳校金源雜事詩詳校凡八鉅冊先生  
歿于蔣氏遺書都在蔣家乃枕山遽逝而先生之書遂不  
可得見也斯則重可慨矣枕山卒後詩集箋注亦不重刷  
印外間欲得是書頗不易垚在都中婁致書友人謀再刷



印以廣其傳卒不得可歎也其金源雜事詩稿則藏在我  
友沈君柳橋處庚子九月十六日烏程沈垚記于宣武門  
內之寓齋

元遺山先生集補載終